

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 26, No. 561

原始資料: CBETA 人工輸入, CBETA 掃瞄辨識

No. 561-A心經金剛經兩大意引

佛說諸經。為法中王。所說心經金剛經二經。更為經中王。凡具眼耳鼻舌身意。得號為人者。亦知聞是經典。信心不逆。亦知書寫受持讀誦。為人解說。無論緇白男女。梵刹市廛。有不知尊重此二經者。必非人矣。人人具足。法法圓成。即此便信。眾生與佛。了無有二。黃梅以之印心。壇經以之發口。宗門正眼。舉不外此摩訶般若也。今日之王止菴。與當日之龐居士。各具手眼勝因。東魯談經。則臯比據席。西乾轉藏。則靈鷲登峯。特特拈提。二經大意。讀之正如水入乳。如芥投鍼。如如意珠。循環無端。牽挽不斷。無假揉和。貫串自然。徹底圓明。緣無始劫來。受持讀誦者。出而為人解說。所謂妙契佛智。善入佛慧。佛本以其能。遍許善男子善女人。匪獨以其能。專許比丘。經言更自了了。則現白衣居士身。而為說法者。吾以信之止菴。

曹溪受法福徵譚貞默槃談書

No. 561

心經大意(附)

撮槃

秀水止庵 王起隆 述

或問於王子曰。子述金剛大意。則然矣。不識心經大意云何。王子曰。難言哉。金剛。八部般若之一種也。心經。以少文攝多義。為八部般若之提綱。六百卷雄文浩瀚。收盡於連題二百六十八字之中。佛語精要。極盡於斯。若論大意。則心經大意。與金剛大意。亦無二無別。或曰。何以明之。曰。梵語般若波羅蜜。華文智慧到彼岸也。佛說此經。專以度眾生苦厄為心。眾生苦厄。本於愚癡。愚癡破於智慧。真如和合。無明。不思議變。不思議薰。而有五蘊。五蘊愚癡。即五濁也。亦名萬苦根株。亦名生死有海。凡夫戀苦。愚癡而執有。流浪苦海者也。小乘怖苦。愚癡而耽空。但自求出苦海。不肯度人同出苦海者也。執有礙有。不得自在。耽空礙空。亦不得自在。總無智慧也。有智慧而小也。繇是萬劫千生。墮分段生死苦。墮變易生死苦。墮界內界外。三苦五苦八苦。塵沙羅穀。粗細諸苦。將人人本具個個圓成一段智慧光明。或沉埋不現。或偏現不全。涅槃彼岸。誕登者鮮矣。我佛慈悲重深。哀痛憐憫。於談般若時。為揭得大自在力。無畏施眾生之觀音。呼告智慧第一。不樂小乘。可興慈運悲之鷲子。示人出苦之方。教之登岸之法。觀音具耳根圓通。圓照三昧。又具救苦尋聲三昧。以觀自在。得名自在。自觀則智慧。不同凡夫。行深般若。則行解又迥殊小乘。上與諸佛同慈力。下與眾生同悲仰。則不但能自出五蘊苦海也。又能迴入塵勞。

救度眾生。同出苦海。究其神通。作用簡捷。無他不過。照見五蘊皆空。度一切苦厄而已。五蘊統之一無明。析之則曰色受想行識。色賅根身器界。居般若八十一科之一。為堅固第一妄想。我相也。受想行識。係虛明妄想。融通妄想。幽隱妄想。顛倒精想。純以攀緣心為自性。我見也。所謂形為罪藪。心為賊煤。一切苦本。不但能障凡夫。并能障賢聖者也。然先佛有言。妄想無性。則五蘊如幻翳。不實如空華。觀音菩薩寂照含虛空。洞徹源底矣。其照見蘊空。非五蘊有。而菩薩。以照見空之也。五蘊而有。菩薩雖照見之。安能空之。實五蘊原無。而菩薩獨具此照見。即為五蘊消亡。即為虛空銷殞。所謂真如無始無終。無明無始有終也。五蘊不照見盡。相見二妄亂起亂滅。生死無休。是名煩惱海。五蘊能照見。則一真嘗湛。原無生死。萬法圓融。是名真空界煩惱海中。因色有根。因根有塵。因塵有識。因識有十二因緣。有四諦。有智得。有生滅。有垢淨增減。有凡夫法。有圓覺聲聞法。種種罣礙也。恐怖也。顛倒夢想也。凡聖熾然。轆轤上下。微雲不淨。亦點太清。所謂迷之則業苦集。無一得自在也。真空界內。無六根故。則無六塵。無六塵故。則無六識。無六識故。則無十二因緣。無四諦。無智得。無生滅。無垢淨增減。無凡夫法。無圓覺聲聞法。無罣礙。無恐怖。無顛倒夢想心。佛眾生一道齊平。鑄有陶空。如屈伸臂。所謂悟之則萬苦息。無一不自在也。佛憫凡小愚癡。約此色空二法。作破蕩前矛業。為揭出照見五蘊皆空六字。又從六字中。開出照見實義曰。色不異空。空不異色。色即是空。空即是色。為一十六字。色不異空。耑破凡夫執有。空不異色。耑破小乘耽空。色即是空空即是色。耑表空非異蘊離蘊之頑空之斷滅空之小乘偏空。乃蘊空互融。為即空即假即中。無則不掛一絲。有則森羅海印之勝義空之第一義空之二十大空之真空。是諸法空相。真療眾苦之靈丹。度二死之幢筏。所謂諸佛說空法。破除於有相。若復執於空。諸佛不能化。此也。所謂因緣所生法。我說即是空。亦名為假名。亦名中道義。此也。按之。金剛經曰。佛法無實無虛。非色空空色乎。一切有為法。如夢幻泡影。如露亦如電。應作如是觀。非照見五蘊皆空乎。我於三藐三菩提。無少法可得。非無智無得乎。無人我相見。無眾生壽者相見。節節支解。曾無嗔恨。刀割香塗。了無二視。有何苦厄乎。滅度一切眾生。實無眾生滅度。非究竟涅槃乎。如如不動。非自在乎。此自在二字。即般若嘗光。真如佛性。諦觀法界。人天具此自在。二乘具此自在。相似分真菩薩具此自在。諸佛具此自在。一切外道魔羅蝟翹含識。無不具此自在。但不觀則自在隱。智慧化為愚癡。觀則自在呈。愚癡轉為智慧。然觀而自在在也。即不觀而自在原在也。眾生不自在之佛也。汨然煩惱。此岸也。佛自在之眾生也。超然智慧。彼岸也。夫如是則照見五蘊皆空。度苦到彼岸。又只觀自在三字。收之無餘三字。又佛語精中之精。要中之要。心經精要。極盡於斯矣。苦厄眾生。欲學觀自在菩薩修行甚深般若。畢竟如何。乃到彼岸。怖五蘊苦海逃之者。不得到彼岸也。處苦海中。而看破原無苦海。當念升躋。乃可到彼岸也。畏避五蘊苦海眾生。若將浼焉者。不得到

彼岸也。五蘊苦海誓先入。如一眾生未出苦。誓不於此取泥洹。乃真能乘智慧到彼岸。圓通廣大。無量無邊。為善學觀自在菩薩者也。要之不但觀自在菩薩。乘此智慧到彼岸也。凡為菩薩如觀自在者。俱乘此智慧到彼岸也。不但權居菩薩乘如觀自在之一佛乘此智慧到彼岸也。凡為過去莊嚴劫。現在賢劫。未來星宿劫。當陽諸佛。俱乘此智慧到岸也。宜乎楞嚴選擇圓通。獨讚觀自在菩薩。為離苦得解脫。良哉觀世音也。成就菩提心。觀世音為最也。大般若全經。數百萬字。冠此二百六十八字。靈文祕文。顯說密說。循其首尾。三科亦備。觀自在菩薩起。至度一切苦厄止。可當序分。舍利子色不異空起。至真實不虛止。可當正宗。故說般若波羅蜜多呪至末。可當流通。其義細演之。何但八部六百卷。殆海墨書而不盡。大千界莫能容。精收之。則八部六百卷。收為二百六十八字。二百六十八字收為色不異空一十六字。一十六字收為照見五蘊皆空六字。六字收為觀自在三字。退藏於密。愈簡愈該。類寶絲網。懸大摩尼。盡十方三世。吸入一珠。毫無滲漏。萬道寶光。綺互交疏。聯絡不紊。非佛流出妙明心廣長舌。後來聲聞弟子。能有此結集耶。而受持此心經者。非深達我佛被機被器。特提觀音鷲子。亦如金剛會上善現當機啐啄本懷。將同泛海。失斗杓。迷針路莫知歸宿也。究竟心經。歸宿安在。曾不出金剛所具。乘六如之觀智。掃五蘊之空華。表生佛之一如。達真空之實相。而至矣盡矣。般若波羅蜜多。為智慧到彼岸。無剩義矣。臆見所云。與金剛大意。無二無別也。等而推之。如維摩曰。斷諸邪見有無二邊。楞伽曰。若有若無有。是二悉俱離。楞嚴曰。圓滿菩提。歸無所得。圓覺曰。知是空華。即無輪轉。法華曰。眾生處處著。引之令得出。少室曰。廓然無聖。壇經曰。於相離相。於空離空。青原曰。聖諦亦不為。南嶽曰。修證則不無。汙染即不得。永嘉曰。百千世界海中漚。三世聖賢如電拂。凡此俱與心經。破色破空。智慧到彼岸。同一諦義。作如是觀。則總一大藏。五時八教。俱此物此志。經即佛心。佛心即經。誰得二之。智慧愚癡。本無異性。此岸彼岸。本是同源。誰得礙之。迷時累劫。悟即剎那。金口所宣。盡大神大明無上無等等之圓頓真宗。正法眼藏也。獨心經金剛為然哉。

王子述心經大意竟。或曰。子言則晰矣。非曾讀般若大經。人未必盡解奈何。王子不禁心惻也。經意有須宛轉發明者。有只須彙括了然者。心經經之心也。心在經中。如日在天上。方便初機。簡之彌貴。又撮大意之槩。而為言曰。般若波羅蜜多心經。開眾生佛見。度苦海慈航也。九界眾生。各有身心。身心苦厄。萬千總名。不出五蘊。五蘊若能看破。當下元自真如。其如凡小謬迷。不能開此智眼。或戀五蘊。而執色為實色。或怖五蘊。而墮空為偏空。所以常囿死生。菩提遙遠。西方聖人。憫苦海之流浪。約空色以破明。恐固蔽之難除。先引援為證據。舉行深般若之菩薩。係過去正法明如來。告智慧第一之聲聞。乃現前最上乘根器。從一心以觀自在。照五蘊而說皆空。使知色不異空。祛凡夫之我執。空不異色。醒二乘之耽枯。色即是空。顯菩提薩埵。即五蘊以證究竟涅槃。空即是色。明三世諸佛。即五蘊而成正等正覺。真空不

幻。但非生滅垢淨增減之可參。諸法無名。了無四諦十二緣智得之留滯。生死一如。夢醒一如。有甚罣礙恐怖顛倒夢想。凡聖齊平。因果齊平。何分生佛菩薩緣覺聲聞。但莫墮空墮有。一心不生。自見無欠無餘。萬法無咎。不動步而到彼岸。符大士以證圓通。二百六十八言。於八部般若。若網在綱有條不紊。一十八字神呪。胥萬靈呵護。如王有令靡不遵從。昔裝師西遊。魔鬼阻途。惟持心經。應念消散。持者當淨其意。猶如虛空。以十喻六如觀五蘊。以一子地視興慈悲。以聞薰聞修。修一心三觀。以人空法空。證四智菩提。了知真空之體。無性緣生。如明鏡漢胡俱現。幻有之色。緣生無性。如鏡像於鏡原無。於法無一法當情。無一法違礙。縱橫大用。不動微塵。凡小牢籠。忽然超越保任。剋期度苦。靈應無方。否則空誦循聲。念到舌生毛。有何交涉哉。大意慮難開蒙。敬復成斯撮槩。空中打槩。何辭謗法罪愆。禦木成文。竊當發露懺悔云爾。

心經。經之心也。亦心之經也。諸經一經。自為一經。心經管攝般若大部為經。不但已也。實管攝一大藏諸經為經。蓋佛以一大事因緣出現。除却度凡小眾生。同度一切苦厄外。謂佛別有剩懷。是真打空中槩討水底天也。佛說一切法。總度一切心。一任宗門教門舌頭千丈。另有開口處乎。說是經之雄偉者。近無如紫柏尊者之三說心經。李卓老之心經提綱。靈峯素大師之般若觀心釋。余為大意。並不敢一摭入。正以寧淺。無深方便。讀者直見佛心。如舒拳見掌耳。若夫般若大經。八十一科。欲通其義者。自有古今之疏釋在。

佛弟子王起隆又識

No. 561-B心經大意自跋

或又曰。儒禪淆濫。持世道者之憂也。子儒衣談佛。且為分疏。非惟攙行之譏。實蒙二本之責。子自救不了。奚啻之贅歟。余應之曰。朝聞夕死。先聖之言也。此心此理。同先儒之言也。鄒子輿氏。惡二本之夷之。亦惡執一之。子莫儒佛參同。大明於世界已久。不待今日也。自悲智慧鄙劣。發蒙小言。其於闡揚性道類。置紙燈於二曜之下。憂瓦缶於八音之間。焉能為有無哉。惟違心作誑。好名為欺之語。自信操筆時。凜凜佛菩薩聖賢。舉頭鑒照。不敢隻字蹈焉。然則儒衣談佛罪。知不顧者。非二本也。惡執一也。儒禪諸書。有詳說。有反說。約心經金剛。約之約者。偶因酬答機緣謬。各述為大意。目底法門龍戰。道術羊岐。原為明道。用東魯之學疏經。匪云背儒。與西乾之徒。奪席從此。余且為杜口毗耶矣。

己未孟秋。東海止庵。王起隆識於楞嚴之般若堂。

善信汪裕助銀四錢。沈純祉錢甲徵王穎之黃承蒼高佑鈺各助銀五錢。尤天祚助板二錢。刊此心經大意。比丘受付真境各助印四錢。謝文英書繆時化梓。同祈開佛知見。破除凡小愚癡。證性菩提。度脫塵勞苦厄。

王起隆敬識 板寄楞嚴流通